

Inzko informirao zamjenika državnog sekretara SAD-a Steinberga o prijetnjama Mirovnom sporazumu za BiH



Bosna i Hercegovina je suočena sa najozbiljnijim prijetnjama Daytonskom mirovnom sporazumu od kada je potpisan 1995. godine, izjavio je visoki predstavnik i specijalni predstavnik EU u Bosni i Hercegovini Valentin Inzko prilikom susreta sa zamjenikom državnog sekretara SAD-a Jamesom Steinbergom danas u Washingtonu.

U proteklim godinama, suverenitet, teritorijalni integritet i funkcionalnost BiH stalno su bili predmet sve većeg osporavanja. Sada, sedam mjeseci nakon izbora, još nema izgleda za formiranje nove vlade na državnom nivou, a proces evroatlantskih integracija je zaustavljen. Prošlog mjeseca, Narodna skupština RS donijela je odluku o održavanju referenduma usmjerenog protiv državnih pravosudnih institucija i ovlaštenja visokog predstavnika koja je dobio od UN-a. Ovaj potez predstavlja prijetnju samim temeljima na kojima počiva mir u BiH u proteklih 15 godina.

“Odgovor međunarodne zajednice na ove aktivnosti mora biti odlučan i jedinstven, rekao je visoki predstavnik i specijalni predstavnik EU Inzko.

Ustav Bosne i Hercegovine, koji je također i Aneks 4 Mirovnog sporazuma, ne dozvoljava niti jednom od entiteta u Bosni i Hercegovini da odbacuju nadležnost državne institucije. “Političari u RS to znaju i trebaju znati da je podrivanje

Mirovnog sporazuma opasna politička avantura – i to avantura koja može imati nepredvidive posljedice”, rekao je visoki predstavnik i specijalni predstavnik Inzko. “Naš zajednički odgovor na ovo bit će također i rano testiranje Službe za vanjske poslove Evropske unije”, rekao je Inzko.

Na trenutni razvoj situacije ne treba gledati kao na kratkoročnu krizu, nego kao na kulminaciju nesretnih događaja u nekoliko posljednjih godina, što ukazuje na potrebu kontinuiranog međunarodnog prisustva u BiH.

“BiH još nije postigla političku stabilnost koja joj je potrebna da dalje nastavi samostalno”, naglasio je visoki predstavnik Inzko. “Potreba za međunarodnim prisustvom sa izvršnim ovlastima poput onih koje imaju Ured visokog predstavnika i EUFOR je evidentna”. Međunarodna zajednica treba da sačuva dovoljno instrumenata da spriječi pokušaje poništavanja ranijih postignuća u izgradnji države i stvaranja nestabilnosti, što bi moglo imati negativne posljedice za cijeli region.

Visoki predstavnik je zahvalio zamjeniku državnog sekretara Steinbergu za snažan i konstruktivan angažman Sjedinjenih Država u BiH, uključujući i njihovu suštinsku ulogu u Vijeću za provedbu mira.